

# ЯНГИ ҲАЁТ УЧУН, ЯНГИ ЎЗБЕКИСТОН УЧУН!



2-noyabr 2023-yil 44 (1042)



www.21asr.uz



@XXIasr\_yangiliklari



XXIasrgazetasi



xxi\_asr@mail.ru



asr\_xabarлари\_news



## КЕЛИБ КЕТМА – БИЛИБ КЕТ

МАЪРИФАТЛИ ЖАМИЯТ САРИ

“Агар сиз фарзандингизга данғиллама уй қуриб берсангиз – вақти-соати келиб, у эскириши мумкин. Агар энг зўр машина олиб берсангиз – уям тез орада эскириши мумкин. Агар унга моддий бойлик, пул қолдирсангиз – уям бир кун сарф бўлиб тугаши мумкин. Аммо дунёда ҳеч қачон эскирмайдиган, йўқолмайдиган бебаҳо бир бойлик борки, у ҳам бўлса, фарзандингизга берган билим ва ҳунардир. Лекин билим ва маърифатни қаердан, нимадан олиш мумкин? Аввало, китоб деган хазинадан!”



Сирожиддин САЙИД,  
Ўзбекистон халқ шоири,  
O'zLiDeP Сийсий Кенгаши аъзоси

Бу дунёда бойликлар беҳисоб: моддий ва маънавий бойликларни санаб адоғига етиш мушкул. Лекин улар орасида ТИНЧЛИК аталмиш буюк саодат, неъмат борки, унинг бошқа қиёси йўқ! Донишмандлар бежиз юрти тинчнинг ўзи тинч, деб айтмаган. Тинчлик-осойишталик ҳукм сурган жойдагина халқ фаровон яшайди, юксалиш, тараққиёт, бунёдкорлик бўлади.

Шу маънода бугун дунё харитасига боқсангиз, қанча давлатларда турли кўринишдаги можаролар, қуроли тўқнашувлар рўй бераётганига гувоҳ бўласиз. Яратганга минг қатла шукрки, бизнинг минтақада, хусусан, Ўзбекистонда шодмонлик, фарахбахш кунлар, барқарорлик ҳукмрон. Кўп миллатли бағрикенг халқимиз тинч-хотиржам ҳаёт кечирмоқда.

Куни кеча Президент Шавкат Мирзиёев гидроэнергетика соҳасида амалга оширилаётган лойиҳалар ва энергетика тизимини куз-қиш мавсумига тайёрлаш бўйича вазифалар ижроси юзасидан ўтказилган йиғилишда кун тартибига ўтишдан аввал ҳозирги кунда бутун дунёда катта ташвиш ва хавотир уйғотаётган масалага тўхталди.

“Маълумки, Исроил армияси ва Хамас ҳаракати ўртасида давом этаётган қуроли тўқнашувлар гуманитар инқирозни чуқурлаштирмоқда, тинч, беғуноҳ аҳоли орасида кўп сонли қурбонларга олиб келмоқда.

Болалар ва аёллар ҳалок бўлмоқда, одамлар бошпанасидан айрилмоқда, ўз уйларини ташлаб кетишига мажбур бўлмоқда.

Биз Фаластин ва Исроил томонидан қурбон бўлган барча инсонларнинг оилаларига чин дилдан таъзия ва ҳамдардлик изҳор этамиз.

Мен Ғазо сектори аҳолисига баҳоли қудрат ёрдам кўрсатиш учун Бирлашган Миллатлар Ташкилотининг Яқин Шарқ агентлигига 1 миллион

500 минг доллар ажратиш ҳақида қарор қабул қилдим.

Биз Фаластин халқи билан бирдам эканимизни қатъий билдираемиз ва унинг Бирлашган Миллатлар Ташкилоти Бош Ассамблеяси ва Хавфсизлик Кенгашининг илгари қабул қилинган резолюцияларига мувофиқ ўз мустақил давлатини барпо этишига бўлган ҳуқуқини қўллаб-қувватлаймиз”, деди Президентимиз.

“Зўравонлик янада авж олаверса, бу халқаро вазиятнинг кенг миқёсда издан чиқишига, қуроли тўқнашувларга янги кучлар тортилишига олиб келади.

Буларнинг барчаси Яқин Шарқ минтақаси билан чекланмай, узоқ ўлкаларга ҳам тарқалиб кетадиган, оқибатини башорат қилиб бўлмайдиган фожияларга олиб келиши мумкин.

Айнан шунинг учун ҳам биз ҳар икки томонни зудлик билан гуманитар мақсадларда муромага келишига, жанговар ҳаракатларни тўхтатиб, низони тинчлик йўли билан ҳал этишига чақирамиз.

Маълумки, биз яшаётган Марказий Осиё минтақаси турли миллат ва конфессиялар вакилларининг ўзаро тинч-тотув ҳаёт кечирishi бўйича ноёб тажрибага эга.

Бу заминда асрлар давомида мусулмон, христиан ва яҳудийлар дўстлик ва ҳамжиҳатликда ёнма-ён яшаб келяптилар.

Мен бугунги фурсатдан фойдаланиб, барча юртдошларимизга, аввало, ёшларимизга мурожаат қилиб, уларни турли ёлғон ташвиқотларга берилмасликка, қонунга зид хатти-ҳаракатлар содир этмасликка чақираман.

Бизнинг энг катта кучимиз, бебаҳо бойлигимиз бўлган тинч ва осойишта ҳаётимизни, ўзаро бирлик ва ҳамжиҳатлигимизни барчамиз биргаликда асрашимиз зарур”, деди давлатимиз раҳбари.

“XXI asr”нинг шу ва бошқа долзарб масалалар таҳлилига бағишланган шарҳи билан газетамизнинг 5-саҳифасида батафсил танишасиз.

Олий минбардан туриб айтилган шу мазмундаги сўзлар мамлакатимизнинг ҳамма гўшаларида, энг чекка ҳудудларгача аҳолининг барча қатлами орасида акс-садо берган эди. Ёшу қари, эркагу аёл, ўқитувчи билан шифокор, фермер билан тадбиркор – турли касб, турли тоифадаги ватандошларимиз оғзида шу гап, шу хайрихоҳлик билан қувонч ва ҳаяжон: – Жуда тўғри айтилди. Вақтида айтилди. Худога шукр, рўзгоримиз бут, қорнимиз тўқ. Энди тарбияни ҳам бутлаш вақти келди!

Дарвоқе, халқимизда ҳам бир гап бор: “Келиб кетма – билиб кет”. Барча ўқув даргоҳларининг пештоқиға эслатма қилиб осиб қўйса бўладиган даъват бу. Давлат раҳбари ҳам астойдил ёшларни ўз фарзанди қаторида кўриб, барака топқур, мактабга қуруқ келиб кетма, бирор нарса ўзлаштир, ўрган, ҳар куни билимингни нима биландир ошир, деб таъкидламоқда.

### БУГУНГИ СОНДА:



**СОҲАВИЙ АДАБИЁТЛАРНИ**  
ДАВЛАТ ТИЛИДА ЁЗИШ ВА ЧОП ЭТИШ  
ФУРСАТИ КЕЛДИ



**АЗАЛИЙ ҲАҚИҚАТЛАР**



**ҲАММАМИЗ КАСАЛМИЗ!**  
“АСР ВАБОСИ”ГА АЙЛАНАЁТГАН НОМОФОБИЯ

**XXI АСРНИНГ 24-ЙИЛИДА  
ҲАМ “XXI asr”  
БИЛАН БИРГА БЎЛИНГ!**

**ОБУНА 2024**

**Обуна индекси – 406.  
Мурожаат учун телефон: 71 255 68 50.**









